

鞏縣志卷之四

鞏縣知縣李述武纂修

山川志

古書志山者莫古於山海經志水者莫詳於水經注府志既仿二書志山川矣鞏邑山在南者與嵩對峙而支幹自份在北者與邙連體而主名各別故標南北山以經諸山治以西水盡洛入治以東水或入洛以入河或徑入於河故標河洛以經諸水體例紀載一仍施府志而稍加詳焉志山川

鞏南山

鞏南山之首曰轅轅山

鞏縣志

第一册 卷之四

山川

四十三

河南商務印刷所印

〔明史地理志〕鞏縣西南有轅轅山上有關

一方輿紀要〔轅轅山在鞏縣西南九十里其坂有十二曲將

去復還故名 〔左傳襄二十一年〕晉欒盈奔楚過周王使

候出諸轅轅〔註〕今河南府鞏縣西南有轅轅山

按後漢地理志以轅轅屬偃師晉地理志以轅轅屬登封惟明史及方輿紀要春秋彙纂以為屬鞏縣蒸轅隸有古今兩道今道易在西隸偃古道險在東隸鞏兩道交處隸登封山傍古道則全入鞏

轅轅東十里曰講山

〔山海經〕講山其上多玉多柘多栢有木焉名曰帝屋葉狀如椒反傷赤實可以禦凶〔郭注〕反傷刺下勾也〔施府志〕講山西接轅轅東走浮戲南與太室隔深澗俗呼瓦屋川

北下有洞俗呼百葉洞

按講山及後嬰梁郭注雖未指名鞏山然以經文考之自少室以東所次道里方位二山當在鞏縣

講山西北十里曰九山

〔水經注〕九山一名百稱山其山孤峯秀出巉嶢分立仲長統曰昔密有卜城者身遊九山之上放心不拘之境謂是山也山際有九山廟碑云九顯靈府君者太華之元子陽九列名號曰九山府君也南據嵩岳北帶洛澗又有百蟲將軍廟碑云將軍姓伊氏諱益字隕斨帝高陽之第二子伯益也

按九山廟碑金石攷以為在登封據府志九山今名白雲山在鞏縣西南七十里有舊山廟坡蓋九舊音轉也更以碑文推之南據嵩岳北帶洛澗若在登封則與洛澗尚隔數山未確又九山東有嶺曰搖嶺舊志以為宋置鐵冶於此九山西北有毫邱晉稽含隱處直偃師西毫南殷人圓丘今為鞏六莊九山抵洛澗為禹封鄩城今羅莊

講山北迤西十里曰牛山

〔盧元明嵩高記〕太室後有小山名牛山其中多杏

按講山北嬰梁山北與霍山接體而牛山不見山海經府志雖疑即牛首而未嘗確指故但以嵩高記牛山而嬰梁則次霍山下

講山東十五里接開封界曰浮戲山

即方山府志一名五至山舊縣志一名五枝嶺

〔山海經〕浮戲之山有木焉名曰亢木汜水出焉而北流注於河其東有谷名蛇谷上多少辛〔郭注〕少辛細辛也〔水經注〕羅水出方山洛水方山即山海經所謂浮戲之山也

洧水注

〔施府志〕汜水出浮戲東麓羅水出浮戲西麓

按鞏西南山西界休水東北界羅水其中但有講山等四山餘則連體浮戲綿亘鞏地大半

浮戲北二十里曰霍山一名天陵山亦曰東西青龍山〔山海經註〕今平陽永安縣廬江濬縣晉安羅江縣河南鞏縣皆有霍山爾雅大山繞小山爲霍 〔方輿紀要〕青龍山在鞏巖南四十里以在宋陵東得名

〔施府志〕浮戲北有雙峯高峙俗呼盤龍雙尖西北爲西青龍與東青龍異山合體中有慈雲寺寺前龍潭北流爲石子河西青龍有石人峯登峯見山脊環繞如高墉中列數十峯皆攢秀獻奇於足下所謂大山繞小山爲霍也西卸北走爲小青龍山盡處爲牛頭山眞宗陵在其後徐仁旺與丁謂所爭牛頭山前後即此非太祖太宗陵南之牛山宋史禮志又

謂之臥龍岡在永安縣東北六里岡北下有仁宗英宗陵東青龍北下爲鞏縣治治西北爲龍尾山

〔隋書地理志〕鞏縣有天陵山

〔文選注〕岳天陵詩序曰岳屏居天陵東山下

河陽詩註

按天陵山見隋志鞏山無有大於霍山者即天陵也且文選注人多讀爲天陵之東山下如是則曰天陵山東足矣不必曰天陵東山下也蓋天陵分東西如今人分東青龍西青龍者然宜解作天陵東山之下方合或疑天陵即今伏兒山以山東天龍坡爲証不知天龍坡入汜水不得爲据且西征賦注岳家在鞏縣東正當青龍東山下伏兒在鞏東南三十餘里盤巨半在汜水岳故居安得在其東

霍山西南五里曰嬰梁山

〔山海經〕講山北三十里曰嬰梁之山上多蒼玉鐔于元石 〔郭注〕言蒼玉依黑石而生也鐔于樂器形似椎頭

〔施府志〕嬰梁在講山北牛山東與牛山中夾羅水水出峽處謂之羅口

霍山西北十五里抵洛水曰黑石山

〔方輿紀要〕黑石山在鞏縣西南二十五里下為洛水津濟處隋末王世充與李密相持世充夜渡洛水營於黑石明日分兵守營自將精兵陳於洛北李密渡洛逆戰而敗復渡洛趨黑石世充還為密所敗

霍山東北二十里曰龍尾山

〔方輿紀要〕青龍山尾接洛水者曰龍尾山在鞏縣西三里

按龍尾繞縣西南特起一峰色類紫金曰紫金山稍東又一峰曰虎頭山順治初邑令吳三仁改虎頭為南極山

霍山東北三十里曰伏兒山

〔舊縣志〕伏兒山在縣東南三十里

按伏兒無古名以縣志補之至光武左夫人土俗附會不見漢紀宜刪之

伏兒西北五里曰侯山

〔芥隱碑記〕漢王元奕隱於侯山景帝每徵不屈遂就山封侯因以為名宋亮詩王奕拜隱侯 一廬元明侯山記〔漢有

王元者隱於此山 一名勝志〕侯山在鞏縣東南二十五里

漢有王彥者隱於此山就而封侯至今指所居為王彥崖志

謂之王亥山 〔施府志〕元奕彥亥傳寫字譌耳至廬元明

又以侯山為緱山于封侯名山義不合

按侯山西北有奇堆山其山四時蒼翠故名見舊志

侯山北橫抵成臯三十里曰橫嶺

〔方輿紀要〕橫嶺鞏縣東四十里接汜水界李密據興洛倉

隋遣東都兵討之

按綱目劉長恭帥步騎二萬五千討密陳於石子河

又使虎牢鎮將裴仁基自汜水西入以掩其後密分兵伏橫

嶺以待仁基

按綱目密選驍勇分爲十隊六隊陳於石子河四隊伏嶺下嶺下即橫嶺下也

仁基失期不進屯於

百花谷

按橫嶺雖非高山大阜東西橫拖如長虹自鞏至汜長三十里北多山凹李密伏兵處即此西南有崎嶇道通成臯道旁爲百花谷絕壑深澗亦險要之地

浮戲東迤北二十里曰石城山山半以北又曰趙封山一水經

注一石城水出石城山其山複澗重嶺欹疊若城山頂泉流

瀑布懸瀉下有濫泉東流洩注邊有數十石畦畦有野蔬巖

側石窟數口隱跡存焉而不知誰所經始也又東北流入於

汜水〔施府志〕鞏東有老廟山即石城山

〔李通志〕趙封山在鞏縣東南宋種茶於此封固其地故名

按石城趙封本一山但石城南半皆石畦峭壁不可種茶趙所封者在小龍池二天門外北麓二十餘里皆沃土宜茶今石碑尚存即茶樹猶有生者土人採之曰趙家茶山

口一村落名茶店據此則石城山半以北爲趙封而道元所謂石畦石窟皆傍水繞趙封也

鞏北山

鞏北山接偃師界至鞏縣故城東北曰小平山一曰峯原邱

〔張平子東京賦〕王鮪岫居薛綜注山有穴曰岫王鮪魚名

居山穴中長老言王鮪之魚由南方來出此穴中入河水見

日日眩浮水上流行七八十里釣人見之取之以獻天子用祭其穴在河南小平山

按郡國志小平城漢縣廢址在今鞏縣西北有河津曰小平津所謂小平山者當以故城得名

〔水經注〕鞏縣北有山臨城謂之峯原邱其下有穴謂之鞏穴言潛通淮浦北達於河直穴有渚謂之鮪渚爾雅邢疏河南鞏縣東北崖二山腹有穴舊注云此穴與江湖通鮪從此穴而來北入河西上龍門入漆沮 〔方輿紀要〕峯原邱在今鞏縣西北三十里

按文選薛注水經酈注言王鮪穴居相類則小平峯原宜為一山據爾雅疏二山腹有穴似鞏穴在二山之間不得以峯原邱小平山為一山不知爾雅疏本作東北崖二山腹有穴古文二作下乃崖下山腹也蓋鞏故城在山上故目山穴為崖下而穴復入山腹中若作二山解不唯崖字無着而亦無二山同腹之理

鞏縣志

第一冊 卷之四 山川

四十八

河南商務印刷所印

又按爾雅疏以為鞏東北指故城而言也方輿紀要以為鞏西北指今縣治而言也

小平山東北十五里曰大力山

〔石窟寺石刻〕宋西京鞏縣大力山淨土寺又金鞏縣大力山石窟十方淨土禪師

大力山東迤北五里抵洛汭曰神尾山

〔方輿紀要〕神尾山在鞏縣北宋元豐初都水丞范子淵議引洛入汴處 〔施府志〕神尾山為邙山盡處曰神尾者神都山之尾也

按邙山入鞏東西僅三十餘里隨地異名得三山焉 又按古尺短於今尺古尺當今尺六寸古六尺為步今五尺為步古三百六十步為里今三百六十步為里以古準今則古百里當今六十里志中紀山里數俱以今里計前嬰梁山引山海經講山北三十里曰嬰梁之山今以嬰梁屬霍山下與講山中隔羅水相去不及二十里與古三十里正合

附紀
於此

河水

河水東過孟津入鞏縣界為小平津

〔名勝志〕郡國志云小平城漢縣廢址在今鞏縣西北有河津曰小平津即城之隅也 〔施府志〕小平城在平陰東北平陰在孟津縣故方輿紀要以小平城屬孟津不知小平平陰本非一地平陰故城在今孟津鞏孟接壤故小平城遂入鞏縣

按今鞏西北裴峪渡即小平津以裴平音近而訛見府志古蹟

又東過鞏縣故城北右得鮪水

〔水經注〕鞏縣北有山臨城謂之釜原邱其下有穴謂之鞏穴潛通淮浦北達於河直穴有渚謂之鮪渚故河自鮪穴以上又兼鮪稱呂氏春秋稱武王伐紂至鮪水紂使膠鬲候周師即此 〔施府志〕鮪渚今已湮塞而河水舊兼鮪水之稱故著之

又東為五社津

〔方輿紀要〕五社津在鞏縣北五里大河東過鞏謂之鞏河有五社津更始將朱鮪守洛陽遣兵渡鞏河攻湫又建武初遣將軍耿弇等軍五社津而使吳漢等圍洛陽是也

又東過神尾山洛水自西南來東北流注之謂之洛汭 〔水經

注一洛水於鞏縣東洛汭北對琅邪渚入於河謂之洛口自縣西來而北流注河清濁異流儼焉殊別〔程大昌書譜〕洛既北入河河之南洛之北兩間爲汭汭之爲言在洛水之內也渭水入河之間亦名渭汭正其義也又洛水成臯西入河謂之洛汭即什谷也〔明史地理志〕洛水舊經鞏縣北入河謂之洛汭亦曰洛口嘉靖後東過汭水縣入河

〔施府志〕明史謂洛水過汭水縣入河者嘉靖後大河北徙去洛口遠故洛水又東流乃入河今大河復南徙洛水入河處在鞏東北界

又東過洛口柳泉水自柳橋出北流注之

〔李通志〕柳橋在鞏縣東 〔舊志〕柳泉在金溝正南

按柳泉水即洛口東金溝村所出之水也以泉畔多柳得名泉在金溝南五里許有村曰柳源村

又東過成臯入汭水界石城水合汭北流注之

按石城水俗名玉仙河流二十餘里入汭水界北流至成臯東入河故於汭界終記之

洛水

洛水東過偃師縣城南與鞏縣分水休水北流注之

〔水經注〕休水導源少室山西流逕穴山南而北與少室山水合水出少室北流西南流注休水休水又左會南谿水發大穴南山北流入休水休水又西南北屈潛流地下其故瀆北屈出峽謂之大穴口北歷覆釜堆東蓋以物象名矣又東

屈零星隰水流潛通重源又發側維氏原開山圖謂之維氏山休水又逕延壽城南緱氏縣治故滑費休水又西轉北屈逕其城西又北流注於洛水

〔施府志〕酈注謂休水導源少室逕穴山南穴山者今黃鹿崗也休水又左會南溪水發大穴南山大穴南山者今偃師夾溝南山也至謂潛流地下故瀆出峽歷覆釜堆東屈零星隰水流潛通重源又發今亦不然蓋澗底多罅隙水流時有斷續道元據爾時所見言之非休水有重源也

又東歷鄴中

〔水經注〕洛水東北歷鄴中水南謂之南鄴亦曰上鄴逕訾

城西司馬彪所謂訾聚也鞏洛渡水有鄴谷水東入洛謂之下鄴亦謂之北鄴又有鄴城蓋周大夫鄴肸之舊邑 〔施府志〕上鄴今羅庄以鄴肸子羅得名也下鄴今孫家灣即鄴灣南北夾岸實一地今上鄴隸鞏下鄴隸偃師

又東爲訾店渡

〔方輿紀要〕宋景德四年造訾店渡橋 〔玉海〕景德四年二月西京新造訾店渡橋癸酉賜名奉先

又東北過訾城北羅水自東南來北流注之

〔水經注〕羅水出方山羅水西北流蒲池水注之水出南蒲陂西北流合羅水謂之長羅川亦曰羅中也蓋肸子鄴羅之

宿居故川得其名耳羅水又西北流白馬谿水注之水出嵩山北麓逕白馬塢東而北入羅水西北流白桐澗水注之水出嵩麓桐溪北流逕九山東又北九山東谿水入焉水出百稱山東谷東北流入白桐澗又北逕袁公塢東蓋公路始固有此也故有袁公之名矣此流注於羅水羅水又西北逕袁公塢北又西北逕潘岳子父墓羅水又於訾城東北入於洛水也

〔施府志〕羅水出方山即山海經浮戲之山也東接開封界西北至羅水入洛處幾百里蓋西南諸大山之水皆以羅爲經注曰羅水出方山下者則今核桃園水也其曰西北蒲池

水注之水出南蒲陂西北流合羅水者則今菩提寺水也其曰又西北白馬谿水注之水出嵩山北麓逕白馬塢東而北入羅水者則今羅漢寺水也其曰西北流白桐澗水注之水出嵩麓桐谿者則今車園水也於白桐澗水又曰北流逕九山東又北九山東谿水入焉水出百稱東谷者則今嵒嶺水也九山東谿入白桐澗水在牛山西白馬谿水在牛首山東南蒲池水在講山北皆在羅水西南而羅水東北則青龍山自浮戲逆轉西北盤亘數十里故羅水西北流乃入於洛又東明谿泉水北流注之

〔水經注〕洛水又東明樂泉注之水出南原下五泉並導故

世謂之五道泉即古明谿泉也

〔春秋大事表〕賈辛軍於谿泉杜注鞏縣西南有明谿泉

〔施府志〕明谿泉即稍柴務水程明道提舉西京竹木務鞏之稍柴務亦屬西京也有數泉並導南原下側洛水注之

又東北爲黑石渡

〔明史地理志〕鞏縣西南有黑石渡 〔方輿紀要〕黑石渡

在鞏縣西南二十五里下爲洛水津渡處隋末王世充與李密相持充夜渡洛水營於黑石

又東北黃水自東南來西流注之

〔春秋大事表〕昭二十二年王猛居於皇杜註河南鞏縣西

南有黃亭按後漢志涅水即皇也水經注洛水合於谿泉又東濁水注之即古黃水京相璠曰黃亭在訾城北三里今在鞏縣西北

〔施府志〕涅水即和義溝水入洛處在故鞏城上水經注次涅水於故鞏城下豈當時水循岸至鞏城下乃入洛與京相璠謂黃亭在訾城北三里當有誤訾城在羅水入洛處去黃亭尚十餘里杜註謂黃亭在鞏西南是也而大事表又謂在

鞏西北誤

又東北康水東流注之

杜工部集甫十餘歲夢人令采文石於康水覺而問人水在

二十里外乃往求之見峨冠童子曰可於豆壠下取甫依言果得一石有金字文

〔施府志〕康水即康店南水工部故里在嵯灣去康店在二十里外

又東北過鞏縣故城東

〔水經〕洛水東北過鞏縣東〔注〕洛水逕鞏縣故城南東周所居本周畿內鞏伯國〔施府志〕經謂過鞏縣東而注謂逕城南者蓋洛水自西南來過故城東也

又東北石子河西北流注之即乾石河今名石河道

〔明史地理志〕鞏縣有石子河流入洛水〔綱目〕劉長恭

帥步騎二萬討李密陳於石子河〔施府志〕石子河水出東西青龍山澗中有龍湫渟泓不流入夏水乃出故俗呼乾石河方輿紀要謂即泃水非

按綱目王世充兵敗於黑石堅壁不出越王侗遣使勞之世充慙懼請戰與李密夾石子河而陳又大敗今石河道去黑石十三里當是此地

又東北水峪水東流注之

〔縣志〕水峪水出邙山在縣西二十里

又東北過縣治北泃水自南來北流注之即市河水

〔水經注〕泃水發南谿石泉世亦謂之石泉也京相璠曰鞏東地名坎欲在泃水東疑卽此水也又逕盤谷塢東世又名之曰盤谷水司馬彪郡國志鞏有坎欲聚春秋僖公二十四

年王出及坎欲服虔亦以為鞏東邑名也晉太康地記晉書地道記並言在鞏西非也其水又北入洛

〔方輿紀要〕市河在鞏縣東源出青龍山流入洛

〔施府志〕洞水出東青龍山東石澗中下流至黃冶北澗谷作八九盤廻其旁塢即盤谷塢也

按水經洞水宋本作洞水高士傳十隨投洞水而死疑即此水而宋謀璋以為洞潁古字通用乃陽城潁水也夫既有洞水矣似不必改從潁水為是又或以魏氏河當洞水於地形殊不合

又東魏氏河北流注之

〔縣志〕魏氏河在縣東三里流入於洛

又東飲馬溝水自南來北流注之

〔方輿紀要〕飲馬溝在鞏縣東七里呂布軍虎牢飲馬於此

按飲馬溝水出西橫嶺下經魯村西北流入於洛方輿紀要以為在鞏東七里即今十里舖西溝水也地猶名飲馬溝

又東為神堤渡

〔李通志〕神堤渡在鞏縣東北

又東任村水自南來北流注之

〔方輿紀要〕元豐初范子淵議引入洛汴遣宋用臣等相視

興役自任村沙口至河陰縣瓦亭子達汴口接運河長五十

一里兩岸為堤長一百三里

按任村今名任村溝其水即府志所謂任村溝水也

又東北流入於河

〔水經〕洛水北入於河又東北流入於河〔注〕山海經洛水成臯西入河是也謂之洛汭即什谷也張儀說秦曰下兵三川塞什谷之口謂此也黃帝東巡河過洛修壇沉璧受龍圖於河龜書於洛赤文綠字堯帝又修壇河洛擇良議沉榮光出河休氣四塞元龜負書背甲赤文成字遂禪于舜舜又習堯祀沉書於日稷赤光起元龜負書至於稷下榮光休至黃龍卷甲舒圖壇畔赤文綠錯以授舜舜以禪禹殷湯東觀於洛習禮堯壇降璧三沉榮光不起黃魚雙躍出潛於壇黑鳥以浴隨魚以上化爲黑玉赤勒之書黑龜赤文之題也故春秋說題辭曰河以通乾出天苞洛以流吐地符王者沉禮

焉又洛水自縣西來而北流注河清濁異流儼焉殊別

施府志一水經於洛水再言入河似重出及舟下洛口見大河於上流分一枝與洛爲迎合流東下乃入大河知古人紀載不虛也至道元於河洛記圖書者凡三於和山九水曰堯率舜升於首山而導河渚有五老遊焉相謂河圖將來告帝期知我者重瞳也五老乃翻爲流星而升於昴今孟津負圖河是也於伊洛之交曰黃帝煞五牲醮大魚始得圖書今洛偃界伊入洛是也於洛汭記堯壇歷叙黃帝堯舜受圖之事是圖書同出於洛口也

按府志以水經兩言入河謂舟下洛口見大河於上流分一枝與洛爲迎合流東下乃入大河知古人紀載不虛但分支或不常有謂洛入河清濁異流儼焉殊別嘗登什谷

南山望洛入河處循河東流一線清瑩至洛口東始與黃河相交然則水經注所謂北入河者洛水始入河之口清濁未交雖入猶未入也又東北流入河者洛水循河東流至洛口東與黃水相交處也○又按

文淵閣校本水經注洛水條下訛字如舟師所保也案保近刻訛作堡鄴胖之舊邑案胖近刻訛作盼下同洛水又東逕營城北又東羅水注之案此十四字原本及近刻並訛作經蒲池水注之水南出蒲波案近刻訛作出南蒲波謂之長羅川案近刻訛作長川羅白桐澗注之案近刻訛作相北流逕九山東案山下近刻衍東字密有卜成者案卜成近刻訛作卜城太歲在戌案此有脫誤近刻作太歲庚午考元康二年乃壬子也即古黃水也案黃近刻訛作涅又東北河水發南溪石泉案洞近刻訛作洞下同盤谷水案盤近刻訛作鹽洛水又東北流入於河案此九字原本及近刻並訛作經赤文綠字案綠近刻訛作篆修河洛增擇良議沈案修近刻訛作循即作議七政之度案七近刻作什以授之堯案近刻脫堯字又習堯禮案禮近刻作祀